


景定嚴州續志



景定嚴州續志

鄭瑤等撰

編主五雲王

編初成集書叢

志續州嚴定景

中華民國二十五年十二月初版

撰者 鄭 瑤 等

發行人 王 雲 五
上海河南路

印刷所 商 務 印 書 館
上海河南路

發行所 商 務 印 書 館
上海及各埠

鎮

景定嚴州新定續志十卷

宋 鄭 瑤 方仁榮撰

方逢辰序曰。郡之有志。所以記山川人物。戶口田賦。凡土地之所宜也。嚴於瀾右爲望郡。而界於萬山之窟。厥土堅而隔。上不受潤。下不升鹵。雨則潦。霽則槁。厥田則土淺而源枯。介乎兩□。節節級級。如橫梯狀。其民苦而耐。其俗嗇而野。其戶富者畝不滿百。其賦則土不產米。民僅以山□而入帛。官兵□廩。則取米於鄰郡以給。而百姓日糴。則取給於衢婺蘇□之客舟。較之瀾右諸郡。其等爲最下。下而嚴之所以爲望郡而得名者。不以田。不以賦。不以戶口。而獨以雲山蒼蒼。江水泱泱。有子陵之風在也。郡志自淳熙後。缺而不修者。距今七十餘年矣。吳越錢君可則。以太府丞來守嚴。政事之暇。爲之訪蒐。以補其缺。編削訖事。走書屬予爲序。予謂嚴爲我太宗皇帝。高宗皇帝。建旄之地。今皇儲賜履之封。則一郡之山川人物風俗。戶口田賦。職方氏皆欲究知之。矧爲天子聖明。勤卹民隱。凡州牧之出辭入覲。必詳訪焉。是編之作。非惟可以備顧問。亦可以少助宵旰民瘼之萬一也。 蛟峯集

四庫全書總目提要

景定嚴州續志十卷。宋鄭瑤方仁榮同撰。瑤時官嚴州教授。仁榮時官嚴州學錄。其始末則均未詳也。所紀始于淳熙。訖于咸淳。標題惟曰新定續志。不著地名。蓋刊附紹興舊志之後。而舊志今佚也。嚴州于宋爲遂安軍。度宗常領節度使。卽位之後。升爲建德府。故卷首載立太子詔。及升府省劄。體裁視他志稍殊。惟物產之外。別增財產一門。但紀景定麥秀四歧一條。鄉飲之外。別增鄉會一門。但紀楊王主會一條。則皆乖義例耳。然敘述簡潔。猶興記中之有古法者。其戶口門中。載寧宗楊皇后爲嚴人。而鄉會門中。亦載主會者爲新安郡王永寧郡王。新安者楊谷。永寧者楊石。皆后兄楊次山之子也。而宋史乃云后會稽人。當必有悞。此可訂史傳之訛矣。

景定嚴州續志卷一

宋 鄭 瑤等撰

節鎮

嚴州在國初仍唐舊爲睦州。隸吳越。建隆元年太宗皇帝以皇弟領防禦使。車書混一。州隸兩浙西路。政和中。升建德軍節度。宣和三年。改州爲嚴州。軍爲遂安軍。十二月。高宗皇帝以皇子領遂安慶源軍節度使。詔敕悉載前志。翠華駐蹕錢唐。郡爲畿輔。地望日雄。寶祐五年十一月。詔以皇子忠王特授鎮南遂安軍節度使。景定元年六月。御筆立爲皇太子。而此邦節鎮至是愈增重云。

皇子忠王授兩鎮節度使制

門下。御家者親親。所以隆天性之愛。詔爵者貴貴。所以植宗國之強。式稽舊章。茂賁元子。作眞王而啟宇。望已重於承祧。易巨鎮以建旄。崇莫加於疊組。肆涓穀旦。誕舉徽章。爰咨在列之良。式聽揚庭之命。皇子崇慶軍節度使開府儀同三司忠王。食邑八千戶。食實封三千戶。體凝四氣。性備五常。言必詩書。信矣隆師親友之效。動循法度。見諸鳴玉曳履之間。雖岐嶷之夙成。亦進修之加益。每見晨昏之定省。能知宵旰之憂勤。契於朕心。豈非天意。乃者歲祠重屋。祿禮貳觴。祖考神祇之顧歆。遠近內外之歡洽。豐水數世。將益廣於周仁。大國十城。詎可拘於漢制。洪惟端拱之屬賢詞。常領荆湖而建將壇。庸按版圖。丕崇令典。新定則我太宗之舊建。洪都則我壽聖之初潛。植纛建牙。煥陳儀於兩鎮。加田陪食。仍眎禮於三台。以承累

世之休。以共萬年之福。於戲。立愛立敬。朕非假名器之私。克儉克勤。爾尙贊邦家之治。往服明訓。益綏令猷。皇子可特授鎮南遂安軍節度使。依前職位。加食邑一千戶。食實封四百戶。主者施行。

節度使榜

遂安軍節度使。應遂安軍管內官吏軍人僧道百姓等。茲者。仰荷乾尊。誕申異命。漢真王之璽綬。仍履舊封。唐兼鎮之節旄。特昭異數。睠嚴陵於左輔。實高廟之初潛。祇榮已凜於涉冰。延見懼違於問曉。洪惟上聖。動契天心。謂社稷太平之階。積於彊本。而父母生民之澤。寓在立親。家之安者。下之寧。近之篤者。遠之舉。凡爾搢紳多士。介冑連營。丕體皇恩。叶肩職分。粵若緇黃之侶。暨夫斑白之氓。宜以慈善廣教風。宜以孝悌形燬俗。諸有尊屬。並存問之。右榜遂安軍仍散下管內。各令知悉。

寶祐五年月日。皇子鎮南遂安軍節度使。開府儀同三司。忠王押。

御筆立忠王爲皇太子

朕祇承統業。於今三十有七年。夙夜不敢康。懼弗克昭。受上帝命。惟曩一親郊。嗣是明禋。凡十有一。嚴恭將事。時靡怠遑。獨主鬯。猶虛孰相大禮。恐無以答幽顯之望。皇子忠王。仁孝恭順。有聞於時。涵養踐修。尤敏於學。是用蔽自朕志。庸正儲闈。將以一忱。對越在上。庶幾祖宗顧歆。神人閭譒。哀時多祉。于以隆萬世不拔之基。可立爲皇太子。仍改名孜。其官屬儀物制度。令有司討論典禮以聞。

立皇太子詔

門下。三代治安至千歲。所以明有道之長。一人元良正萬邦。所以衍無疆之慶。惟君臣父子之並處。實天地祖宗之顧歆。朕以眇躬。嗣臨大統。閱歷春秋之滋久。祇勤夙夜以靡渝。事會孔殷。敢諉興王而啟聖。鑒觀於赫。終幸福善而禍淫。方將嚴禋祀以報稱。戒臣工而妥佑。爰念承祧之至重。詎容主鬯之尙虛。蔽自朕衷。孚于羣聽。皇子鎮南。遂安軍節度使。開府儀同三司。忠王。食邑九千戶。食實封三千四百戶。孝敬而雍穆。濬哲而溫文。學寓虎闥。獨得息養。瞬存之力。禮行鶴駕。具知宵衣旰食之勞。娛心一本於詩書。律已悉安於禮義。朕惟藝祖開基之運。若循環之方來。高皇與子之心。每契合而無閒。肆予元祀。申錫嘉名。渙宸號於大昕之朝。位隆貳極。炳陽精於積燎之後。瑞應重光。穹昊之眷可占。黎元之望允愜。剛辰穆卜。緝典肇修。于以聳前星少海之令儀。于以對世室明堂之景貺。於戲。聖賢聞於天下。旣克當貽燕之謀。謨烈啟我後人。尙益懋延洪之業。祇若朕命。惟懷永圖。可立爲皇太子。改名。仍令所司擇日備禮冊命。主者施行。

立皇太子冊

維景定元年歲次庚申七月丁卯朔十七日癸未。皇帝若曰。太子天下之本也。乾象呈祥。前星有耀。震宮主鬯。神器是司。于以答景貺於三辰。于以衍慶源于百世。元良正則萬邦正。此三代所以爲有道之長也。朕惟我朝。聖聖相傳。世世並受。宏規懿範。用敷遺後。人休肆予涼德。祇承大統三十有七年矣。庸舉圓丘之禮。屢修重屋之禋。今茲孟秋。又將講上儀。陳美報羣公庶尹。先後駿奔。克相禋容。曰。惟元嗣。爰敷大號。

庸建儲宮。咨爾皇子。鎮南遂安軍節度使。開府儀同三司。忠王。食邑九千戶。實封三千四百戶。睿性淵澄。英標玉粹。荷烈祖萬年之澤。爲重華四世之孫。自開朱邸以承休。日侍皇闈而毓德。問寢視膳。謹三朝也。尊師就傅。游六藝也。冠冕服黻。威儀踰濟。動有則也。苴茅授鉞。滿假不有。行有常也。暨渙汗甫頒。離明洞照。羣陰退斂。萬宇肅清。允叶天人之望也。行當秉植圭。嚴亞祿。庶幾宗廟顧歆。百神享之矣。是用穆卜剛辰。端御路朝。冊命爾爲皇太子。改名孜。於戲。惟仁可以厚基本。惟明可以辨邪佞。惟謙可以去驕吝。惟儉可以抑華靡。繼自今親正人。聞正言。行正道。勉之勉之。保我祖宗無疆之景祚。

陞建德府省劄

都司還房門下。中書後省狀照對。兩省準尙書省劄子。勘會溫嚴宜忠州。係今上皇帝潛藩之地。合陞府額。須議指揮。三省同奉聖旨。令中書門下省。日下擬定。申尙書省等。今開具下項。一溫州。本州有永嘉縣。係前代年號。今欲用紹興隆興慶元寶慶典故。以初元爲府號。欲擬陞咸淳府。一嚴州。本州有建德縣。今欲擬陞建德府。一宜州。本州係慶遠軍節度。今欲擬陞慶遠府。一忠州。本州有龍渠縣。今欲擬陞興龍府。伏候指揮施行。申聞事。照得後省所申溫嚴宜忠四州。係今上皇帝潛藩之地。合陞府額。內嚴州擬陞爲建德府。宜州擬陞爲慶遠府。嘉名已稱。第溫州元擬爲咸淳府。近郡稱謂稍生。忠州元擬陞興龍府。所稱尤覺未妥。今欲將溫州改陞爲瑞安府。忠州卻作爲咸淳府。八月六日。奉聖旨依。

右劄付建德府。

咸淳元年月日押。

陞建德府制可

敕門下。朕嗣宅丕后。誕保受民。皇天全付有家。敢怠繼承之敬。乾元首出庶物。聿懷潛躍之初。念聖考之詒謀。擇价藩而賜履。嚴陵龍水之鎮。授節齋壇。永嘉忠南之封。分茅王社。瞻言屏翰之重。允協謳歌之歸。漢輿地之上圖。若稽先典。周舊邦之新命。並賜府名。以永萬年之觀。亦尙一人之慶。其溫州改陞瑞安府。嚴州改陞建德府。宜州改陞慶遠府。忠州改陞咸淳府。故茲詔示想宜知悉。

咸淳元年八月二十八日。太傅右丞相魏國公臣似道。參知政事臣萬里。同知樞密院事兼權參知政事臣燦。兼給事中臣夢炎。詔書如請。

右奉詔付外施行。

咸淳元年八月二十九日午時制可。

城關

州城宣和中。知州周格重築。歲久頽圯弗治。至爲樊牆。以限踰越。嘉定癸酉。知州宋鈞復興板築。越一基有半。乃訖工。築凡東西八百二十有二丈。南北三百四十有四丈。葺補者不與焉。今瀕江一帶。雉堞如制。累經巨浸。莫能壞。餘雖土垣。猶乃堅好。城門八。洎以召去。別儲帑成之。今悉經改作矣。

朝京門。前志爲望雲門。今門樓與和平門樓皆今侯錢可則重建。

定川門。今門樓。知州王恂重建。

安泰門。安流門。今門樓。知州趙孟傳重建。

善利門。嘉貺門。今門樓。知州李介叔重建。

子城。周圍三里。正南爲遂安軍門。門有樓甚偉。淳祐壬子。圯于水。明年。知州季鏞。築基鳩材。念民疲。不敢亟。又明年。替去。知州吳槃成之。樓成不減舊觀。參政徐清叟爲之記。

譙樓。因州門爲之。門之外。左爲宣詔亭。右爲頒春亭。壬子水。郡以厭勝之說。取州碑漂之。明年。知州季鏞。搜舊篆更置。樓亦浸弊。開慶己未。知州謝奕中重修。校官鄭瑤爲之記。

戶口

前志載。紹興己未。戶七萬二千二百五十六丁。一十一萬一千三百九十四。淳熙丙午。戶八萬八千八百六十七丁。一十七萬五千九百有三。蓋昔者丁錢未蠲。民苦重賦。故生子有不舉。自乾道五年。張宣公知州。抗疏祈免。奉旨減放有差。至淳熙丁口之數。比紹興增凡六萬四千五百有九。開禧元年十二月。御筆盡免兩浙身丁錢。從中殿之請也。蓋恭聖仁烈皇太后爲嚴人。故有是請。今爲戶凡一十一萬九千二百六十七口。凡三十二萬九千二百有六。比淳熙之數益增。豈非先太后深仁厚澤之所致哉。故大書之。以著邦人之追慕云耳。

郡治

郡治在子城正北。宣和中。知州周格重建。僅足公宇而已。燕游之地。往往蕪廢。故前志所載。自千峯樹。高風堂。瀟灑樓之外。餘皆名存實無。充拓迨今。甫稱諸侯之居。設廳之北。爲坐嘯。又北爲黃堂。舊名凝香。又北爲

正堂。曰秀歧。

舊名省心。今侯錢可則。以近郊獻雙穗。夢。因更此名。

瀟灑樓。在正堂北。

舊名紫翠。

其下爲思范堂。堂之北爲月臺。燕堂在治事廳之北。又北爲綠陰。東爲東齋。

高風堂。在治事廳之東。又東北爲植賢亭。爲松月亭。堂北有柏石。刻壽柏二字。識其古也。

千峯樹。在高風堂之北。憑子城爲之。其東爲環翠亭。

松關。在千峯樹之下。由松關而北。爲荷池。池之東。爲潺湲閣。西爲木蘭舟。

舊名荷池。

讀書堂。自爲一區。在木蘭舟之西。舊爲北園。淳祐己酉。知州趙孟傳改建。

擬蘭亭。在潺湲閣之東。掬泉爲流觴曲水。

舊名流羽。

其東北爲釀泉。

錦窠亭。在釀泉之南。

舊名采岐。

知州吳槃改今名。

桂館。在瀟灑園池之西。杏園桃李莊。又在其西。

面山閣。自爲一區。在錦窠亭之東。其下爲賦梅堂。

舊名黃堂。

知州季鏞易今名。而以黃堂扁於設廳之北。於義

爲稱。瀟灑園池。郡圃之總會也。

舊名後樂。

射圃。在瀟灑園池之南。爲堂曰正己。

東溪。在射圃之南。亭曰銀潢左界。

舊名飛練。

又南爲翔蛟。

列解

通判廳在軍門內。西風月堂在公廳後。景定庚申。通判曹元發始以舊扁題之。南薰堂在公廳右。嘉定癸酉。通判謝采伯建。

錦繡堂在南薰堂右。淳祐辛亥。通判吳溥建。

園曰西園。爲亭三。曰第一開。

舊名梅亭。

曰愛蓮。曰仰高。舊有茅亭。湛碧。蔬畦。三亭今廢。

添差通判廳在東山下。淳熙丙午。知州陳公亮始以公館爲之。平分風月堂在公廳後。光風霽月堂在公廳左。通判潘墀建。

秀亭。沈東山爲之。足遠眺望。寶祐癸丑。通判楊敬之重建。越三年乙卯。通判吳堅以舊扁題之。餘廳如前志。

倉場庫務

平糴倉附于常平倉。寶祐戊午。知州李介叔置。先是知州宋鈞捐帑買田。爲催科義莊。以便役者。後乃淪沒。至是始根括還官。歲收其八。以備凶荒焉。郡人黃蛻爲之記。合同場在輯睦坊。通判楊敬之重建。

軍資庫舊在儀門外東。今移街西。卽回易庫廢址。

抵資庫在軍門內。東淳祐辛亥。知州趙汝歷以舊醋庫改充。

神泉鑄錢監在朝京門外今廢。

安養院。淳祐壬子。知州趙汝歷。卽神泉監廢址爲之。

餘如前志。

館驛

前志有新定驛。有公館。如歸館。定川館。東館。西館。今悉非其舊。庸志其改作者焉。

行衙二

一在儀門外東。開慶己未。知州謝奕中。以新定驛改建。卽軍資庫舊址。

一在都稅務西。卽多慶園舊址。淳祐丙午。知州章大醇改建。

盍簪亭。

舊名東館。

淳祐壬子。毀於水。明年。知州季鏞重建。

安流亭。在朝京門外江滸。

溪山偉觀。在城上朝京門之南。與南山瀟灑亭相望。羣山獻奇。二江成字。蔓棟鱗層。桅櫓下上。一舉目而盡得之。真偉觀也。景定辛酉。今侯錢可則建。

泳澤亭。在湖堤上。與湖心寺相望。旁爲二亭翼之。曰淨碧。曰汎清。今侯錢可則建。

坊市

前志在城十有九坊。今二十有五。蓋續建者六。易舊名者六。用析書之。

宣化坊在鷗樓外西

桂華坊在梓潼殿西

狀元坊在軍門外。瀉祐庚戌。知州趙汝歷。以方逢辰爲大魁第一。故表之。

清靜坊在天慶觀東

遷善坊在兜率寺前

安樂坊在純孝坊內

右續增

英達坊舊名育英

純孝坊以上一字。犯御。舊名改

里仁坊舊名仁里

留愛坊舊名遺愛

物阜坊舊名阜俗

朝京坊舊名望雲

右續改

橋梁

定川門外。跨新安江爲浮梁。凡百二十艘。舊名政平。前志名永通。寶祐丁巳。知州李介叔重建。至景定庚申。甫四年。往往腐脫。往來者病焉。今候錢可則一新之。名之曰濟川。爲亭於橋之北。曰要津。石橋在城內者十有三。在近郊者五。前志或載或否。今悉書之。

一在軍門前。曰臥龍橋。

一在市心五聖樓下。曰龍津橋。舊名伏龍。

一在子城東門外。

一在嘉貺門內西。

一在雙桂坊北。

一在百順門內東。

一在建德縣治前。

一在縣前直南。

一在縣東。曰章家橋。

一在縣東南。曰舍人橋。

一在建安坊。曰馬賀橋。舊傳以爲馬賀二家共建得名。

一在安泰門內。

一在後瀝舊放生池側。

一在朝京門外。曰余浦橋。景定辛酉。圯于水。郡貢士王炎。捐貲重築。

一在和平門外。

一在陪郭塢口。曰獅子橋。

一在陪郭塢。曰風礪橋。有亭八楹。景定辛酉。圯于水。

一在嶽廟東。一里許。曰杜橋。